

山川典第五十八卷

嵩山部藝文一

加增太室祠詔

漢武帝

朕用事華山至於中嶽獲駿廕見夏后啟母石翌日親登嵩嶽御史乘屬在廟旁吏卒咸聞呼萬歲者三登禮罔不答其令祠官加增太室祠禁無伐其草木以山下戶三百爲之奉邑名曰崇高獨給祠復亡所與

太室贊

晉郭璞

嵩維嶽宗華岱恆衡氣通元漠神洞幽明巍然中立衆山之英

爲宋公祭嵩山文

宋范泰

劉裕敬薦中嶽之靈惟嶽作鎮中畿擬天比峻降祉發輝宣和陰陽道達幽微旣曰輔順亦伐厥違霜露所均萬人是依某以虛薄志掃不庭仰抒國恥俯拯黎甿望嶺懷仁踐境延情金璧之贈愧思交盈思樂時雍終憑威靈舊都旣清三秦期廓豈惟人謀亦仰冥略逝將言旋自雍阻洛何以寄懷

一卮清酌珪璧云乎深誠攸託

祭嵩山文

北魏孝文帝

太極分渾兩儀是生辰作乾寶嶽樹坤靈昭彰天地吐納五精唯中挺節祥契幽經日月交輝寒暑
遞成萬象含和兆類孳盈爰自化闢俶慶胥庭軒轅曜哲伊祁載形逮于有周寶光洛禎川潛龍光
山隱鳳停三才憑微七曜依明人倫傾首百神柔誠造厥區夏歷茲三正應符代續孰不斯營粵我
皇魏飛虬元并螭騰穹象用九黔羸新邦興略丕猷用清佗瓊指陰淹翠溼亭河圖曠覽升中闕銘
朕承法統誕邀休宏開物成務載鑠成齡遷宇柳方闌繩塵城則直之興百堵若星日躔流馥月陸
芳馨鏘旋紫宿景曜黃衡鸞聲嘒嘒鸞和嚶嚶歸蓋如雲還輶若靈惟嵩岳峻極昊青惟邑翼翼
長啟魏京薦玉告虔用昭永貞納茲多福萬國以寧

請隱嵩高表

裴衍

臣幸乘昌運得奉盛化沐藉炎風餐佩唐德於生於運已溢已榮但攝性乖和恆苦虛弱比風露增
加精形侵耗小人愚懷有願閑養伏見嵩岑極天苞育名草修生救疾多遊此岫臣質無靈分性乖

山水非敢追踵輕舉髣髴高蹤誠希藥此沈痾全養稟氣耳若所療微痊庶偶影風雲永歌至德荷
衣萬屨裁營已整搖策納屣便陟山途謹附陳聞乞垂昭許

諫靈太后幸嵩高表

崔光

伏聞明后當親幸嵩高往還累宿鑾遊近甸存省民物誠足爲善雖漸農隙所獲棲畝饑貧之家指
爲珠玉遺秉滯穗莫不寶惜步騎萬餘來去經踐駕輦雜還競驚交馳縱加禁護猶有侵耗士女老
幼微足傷心秋末久旱塵壤委深風霾一起紅埃四塞轅關峭嶮山路危狹聖駕清道當務萬安乘
履澗壑蒙犯霜露出入半旬途越數百飄曝彌日仰虧和豫七廟上靈容或未許億兆下心實用悚
慄且藏蟄節遠昆蟲布列蠓蠕之類盈於川原車馬輾蹈必有類殺慈矜好生應垂未測誠恐悠悠
之議將謂爲福興罪斯役困於負擔爪牙窘於負乘供頓候迎公私擾費廚兵幕士衣履敗穿晝暄
夜淒罔所覆藉監帥驅捶泣呼相望霜旱爲災所在不稔饑饉薦臻方成儉敝爲民父母所宜存恤
靖以撫之猶懼離散乃於收斂初辰致行此舉自近及遠交興怨嗟伏願遠覽虞舜恭己無爲近遵
老易不出戶牖罷勞形之遊息傷財之駕動循典防納諸軌儀委司責成寄之耳目人神幸甚朝野

忼悅

告柏谷塢少林寺上座書

唐太宗

太尉尙書令陝東道益州道行臺雍州牧左右武侯大將軍使持節涼州總管上柱國秦王世民告
柏谷塢少林寺上座寺主以下徒衆及軍民首領士庶等比者天下喪亂萬方乏主世界傾淪三乘
道絕遂使閻浮蕩覆戎馬載馳神州糜沸羣魔競起我國家膺圖受籙護持正諦馭飛輪光臨大
寶故能德通黎首化闍祇林旣沐來蘇之恩俱承彼岸之惠王世充叨竊非據敢逆天常窺覲法境
肆行悖業今仁風遠扇慧炬照臨開八正之途復九寓之跡法師等并能深悟機變早識妙因克建
嘉猷同歸福地擒彼兇孽廓茲淨土奉順輪忠之効方著闕廷證果循真之道更弘像觀聞以欣尙
不可思議供養優賞理殊恆數今東都危急旦夕殄除并宜勉終茂功以垂令範各安舊業永保休
祐故遣上柱國德廣郡開國公安遠往彼指宣所懷可令一二首領立功者來此相見不復多悉

修少林寺書

武后

暑候將闌炎序彌溽山林靜寂梵宇清虛宴坐經行想當休念弟子前隨鳳駕過謁慈嚴觀寶塔以

徘徊觀先妃之淨業薰修之所猶未畢功一見悲驚萬感兼集攀光寶樹載深風樹之哀弔影珠泉更積寒泉之思弟子自惟薄祐鎮切熒懷每屆秋期倍軫摧心之痛炎涼遞運逾添切骨之哀未極三旬頻踵二忌恨乘時而更恨悲踐露而愈悲唯託福田少申荒思今欲續成先志重置莊嚴故遣三思齋金絹等物往彼就師平章幸識斯意卽務修營望及諱辰終此功德所冀罄斯誠懇以奉津梁稍宣資助之懷微慰熒迷之緒略書示意指不多云

戒壇勅

代宗

戒分律儀釋門弘範用申獎導俾廣勝因允在嚴持煩於申謝

大周降禪碑

李嶠

愚臣觀象銅衡紉文金版變化莫神於開闢崇高莫大於富貴陰陽密運帝王操輔相之機曆數潛迴窮壤授甄陶之業故謂上下同德幽明合契靈祇有命旣錫造於雍熙人主推功必申虔乎報謁奉符而勒成展采修祀而益厚增高有道存焉其來尙矣自旦昏交謝前質遞遷朴略洪荒上行於萬八千歲陵夷因革下傳於七十二家披圖而考其樹風按軌而詳其陳迹莫不祇肅其事神明其

道龍駕帝服驪場于鄒魯之垌犧尊象彝藁積於云亭之上咸就發生之宇以爲禮神之宅未有迴
輿按驛觀中土之神靈刻石泥金崇外方之禮祀名臣於是乎斷其去就良史於是乎題其失得然
則置表測日陽城當六氣之交祭林奠山太室爲九封之長神翰降生於廊廡王畿仰矚於峯岫風
雷所蓄俯鎮於三河辰緯所躡旁臨於四岳立崇乾事坤之兆疏就下因高之位捨此地也疇其尙
焉歷千載而撰徽音罕聞先覺超百王而崇軌躅允資元聖我大周之有天下也鼓道德之林藪恢
聖神之事業始於閭闔成於家邦輝光燭於兩朝德澤流於八裔登庸納麓則舜有大功錫範陳謨
則禹濟元后謳歌而鼎新革故揖讓而改物承天由牝馬而御飛龍自頽沙而臻練石蓋千帝所不
能及六籍所不能談若夫兆朕鴻源網緼寶系載千嗣於改律窮桑連乎夢梓皇天瞻命積大寶而
爲家聖道會昌擁洪鑪而作極神基將偃伏構僊派於昭回同達太祖無上孝明高帝合幾察道盡
睿窮神屈帝象而龍潛座台庭而虎變黃星造魏而文握漢圖赤羽興熙而武遷商鼎天冊金輪聖
神皇帝遂荒三極奄有萬方御六辯而高馳憑九霄而下濟若乃元通不測之智神用無方之業超
因越果名流於貝葉之書應物隨緣迹滿於蓮花之會祕恍惚於言象徵希微於識錄亦猶寶應慈

物推心坐雄帝之朝吉祥哀時屈己登女皇之位此之謂神力張寶立寓蕩海夷山正八柱之低昂理三光之盈縮乾坤關鑰於廡下品物爐錘於堂內春生夏長循環奉享之仁暑往寒來奔走赴財成之節此之謂天造左規右制俯察仰觀揆朱鳥於南宮契元龜於東洛天威四臨而有截王道一家而無外均霜調露正六合之樞機叶軌同文立山川之朝市此之謂建國臨戶牖之法座垂星辰之采章嚮明而居端默以聽號令存於寬大規畫出於易簡循名責實而苟且之弊銷極深研幾而變通之理得此之謂立政炤烟灰之墜典寫溪谷之遺音無體無容與天地同節有法有象共陰陽通氣引之而被乎百代橫之而充乎四海此之謂禮樂雷電皆至先王以折獄致刑歲月履端君子以懸書立法殊井疆而知禁畫衣冠而不犯疏械破杻掩方載而勝殘解網取眾閉圜扉而靜讞此之謂刑典操盾秉翳立於賓主之階縫掖攝衣聚之東西之學辨尊卑於章服觀禮容於俎豆委裘多暇合九德以成歌垂拱無爲援五絃而度曲此之謂文教因農隙而講事順天時而鞠旅定功在於歸馬保太由乎止戈然後千包虎皮箭射獬首鞀鼓不作廟堂懸百勝之威尉候無虞征伐罷三邊之戍此之謂武德籍乎千畝所以備衆盛齊於九疑所以嚴禋享苞茅潔乎楚入樽俎隆乎殷

莫於穆顯相而公侯駿奔肅雍和鳴而祖考來格此之謂孝理金玉是賤委於嶢嶸之山與馬不珍
捐其駮裏之服御高辛之黃黼垂孝文之皂綈栝桂茅茨未能埒其卑損藜藿糗飯無以儔其菲薄
此之謂冲挹任皐夔衡旦之輔酌虞夏商周之書網羅并包商榷擬議衆目張而繇倫叙羣才用而
庶績康野無遺賢朝無闕典猶且昧旦勤懇方宵厲惕虛心解顏博愛兼聽防大事察五聲檢身有
常視準繩而爲度祇德罔倦刻盤盂而自警遺身主於循物勞已存乎逸人是以恩澤流通教化洽
著龍荒鼠徼覃寓外之雍熙鳳亢麟州奉寶中之度律遠安邇肅地平天成玉律調年珠囊叶紀棲
京坻於隴畝逸馬牛於衢路悍獫獫斑白不提閭閻無犬吠之驚風俗有鵲居之暇原隰驅輶之
使採詩聽歌萬畝植杖之翁擊壤鼓腹和氣旁礴禎符胖饗招一角五蹄之仁獸儀九苞六象之仙
禽毫蟬出其祥麟昆田化其珍物日烏素毛而丹喙天龜元甲而青純雲蒸霧滴拜九洛之瑤圖電
激雷奔受三清之寶冊若乃山鰲海鯨石銘岩篆之符候月搖風連葉駢柯之祉神靈之所酬酢廣
大之所薦成紛綸菱蕤紹至疊見董狐之窮墨罄簡書而未周夷吾之傾辯畢辭談而不盡昇平之
浹洽也如彼符命之昭彰也若此固可以循類帝之事奉丕天之律聖上方固懷讓德虔守謙光升

中之儀推而不沿也於是王公庶尹牧伯羣僚粵耆艾惇龐之儒洎蠻夷戎狄之長咸進而稱曰陛下欽承元命對越上元廓天地之宏圖張祖宗之丕業臣妾四極驅馭百靈鼓舞發育經緯彌綸之續宣滲漉沈潛懷柔容保之恩備是以人祇順德遐邇宅心元符畢臻黃瑞盡出幽贊乎祖考之茂烈發明乎施尊之盛儀意者三塗滅氛二室儲貺以望屬車之塵久矣帝者雖倦焉得距而已乎伏願坦至公之懷捐獨善之意欽若大典疇咨故實上以光七廟之休德下以納羣生之福祐長爲稱首豈不美歟帝曰俞哉乃包含藝文考練風俗採儒術徵禮官寢五歲之典章核四朝之制度叔孫掌事容成諏日以天冊萬歲二年臘月乙亥闢丹掖開紫微撫元虬按黃道叶紀先路靈威并轂五戎促節旂常畫垂象之文六甲分營壁壘暖太陰之氣雷動海運天迴星轉踰鼎觀而南下望圭臺而左薄陸離方壤煥炳聿皇以屈夫嵩陽萬乘停鑣百司就列文物隱地遺光滿於竹宮與徒沸川輕璫埋於石柱天子乃幸齊寢披仙幄靡薜荔之席陟嬋娟之臺惟夫蠲意澄心所以至誠盡敬於是乎山祇護野風伯清塵玉醴潛滋金砂閣湧神鐘驚曙峯巖傳九乳之音寒律移暄草樹動三陽之色徵祥之報影響不違壬午柴燎祀吳天上帝於南嶽顯祖立極文穆皇帝太祖無上孝明高皇

帝侑神作主天子戴圓冕披大裘登三垓植四邸藉陳耒耜器用陶匏高炎四施耀流沙而燭滄海
廣樂六變來象物而降天神感霏烟瑞露之徵延薰風景星之祉大禮既畢嘉應既臻思欲契精爽
於高明剖靈符於峻極甲申御金蹕登玉輿環拱百神導從羣后遂陵桂萼攀松蹕跨崢嶸而出烟
道排列闕而壯天門羽節高揮上下鳥星之次龜壇下映俯瞰鵬雲之色瓊文祕檢絡之以銀繩寶
算休期探之於金策交大靈於咫尺受洪釐於億萬然後徜徉烟霄炤悵古昔凝神於九天之上遊
目於八紘之表睠觸石之雷雨爰覃作解之恩仰斗杓之運行仍布維新之令是日大赦改元爲萬
歲登封元年歡洽幽明慶沾動植千齡之統由聖代而連九皇萬歲之音自神仙而周四海休氣低
而翔輦神光起而屬天抃舞相趨以降於行殿丁亥禪祭后土於少室下趾東南顯祖妣立極文穆
皇后太祖妣無上孝明高皇后侑神作主戈矛山立玉帛星陳登澗沼之毛輯江淮之物禹會之殊
方異俗俱執豆籩漢祠之偉獸珍禽悉加壇墠撫空桑之琴瑟剌鬱鬯之樽醴咸秩衆靈遍祀羣望
席以黃琮爲鎮書以青石爲緘元封之謁款方丘儀因東峙建武之推功太折禮視北郊陽鳥珥而
仙鶴飛紫雲騰而黃霧起靈之來兮如雨瑞之委兮如山於是事畢功弘禮周慶洽方欲輯珪璧陳

隸任鋪六代之禮文受萬邦之朝賀宏規大業其盛矣哉蓋淳源浸衰叔葉多故神器不還於至道
尊名或假於涼德秦嬴極暴企踵於無爲之朝漢徹窮奢厚顏於盛德之事人不見義其來自久我
后首出帝先遂康天步登封降禪拉宇宙之樞衡立顯崇功定皇王之軌式鴻勛上格於穹昊厚福
旁浸於黎元煒煒煌煌互寶區而宣壯麗巍巍蕩蕩橫山丘而殷聲名固已轡前聖之規謨闡含靈
之耳目方使炎農抱愧愕睨於梁甫之阿姚舜欽風延佇於崇高之路天下大功成矣域中之能事
畢矣昔者鳥獸率舞一人賦元首之篇戎夷來賓四子咏中和之樂時僅平而頌作俗未泰而歌興
況乎咸五登三遠承文武之烈襲六爲七近叶春秋之義神功與二儀並運顯號將七曜俱懸豈可
使時邁無詩於皇不作臣嶠謬忝司牧躬陪錯事末光幸煦長傾捧日之心仙石徒攀終愧凌雲之
筆敢承明制而爲頌云

天命上君君臨下土靈祇允懷品物咸覩翕受三六時乘九五於昭文明粵若稽古闕鑠六氣庭衢
八荒殊鄰篋篋絕黨梯航河海晏謐閭閻阜昌琴橫帝展鼓臥邊場齊衡均度制禮作樂武戢五戎
文興四學法宮布政靈臺視朔化偃中和人還太朴湛恩布濩協氣氤氳嘉庚歲積休符日聞祥開

草樹慶動烟雲乾冊丹篆河圖紫文欽若元命率由前典道洽升中功成丕顯神筴演卦名山除殫
翠鳳銜蕤元龍御辯迴鑾左屈弭節中樞萬騎雷動羣方電趨層壇殷薦登鑾山符駐輦星躔交神
漢曲雷雨下濟輝光仰燭地戶開扉天牢罷獄萬歲重熙三辰改地迎陰廣澤報地方畦庭合六舞
筵陳兩圭神靈茅瑞巨象天犀牒貫銀縷函封金泥禮具德明神觀瑞浹儲算玉斗賜齡金篋知崇
高之可封悟梁甫之虛躡敷帝道於一藝振天聲於萬葉

啟母廟碑

崇融

臣聞天地生成其法自然之謂道陰陽鼓舞其功不測之謂神然則物或類應事因變通乾棟傾而
三光北馳坤輿缺而百川東瀉河淪越雋有郡邑之爲魚水陷歷陽有吏人之化蠶訪遺蹤於女峽
風雨蕭條徵往事於姑泉弦歌響亮盈虛靡定合散焉常不知誰子既老氏之多憎急然爲人寧賈
生之足辯仰觀俯察裁識幽明之故原始反終未窮死生之說得於道而失於道義有必然出於幾
而入於幾理無或廢知變化者其知神之所爲乎臣謹按啟母廟者蓋夏后啟之母也漢避景帝諱
改啟之字曰開厥後相傳或爲開母而顧野王輿地志盧元明嵩高記并不尋避諱之旨以爲陽翟

婦人事不經見諒無所取譬若玉斗璇璣李母之居鄰北極金臺石室王母之宅在西山氣爲母則羣物以萌月爲母則容光必照坤爲母則上下交泰后爲母則邦家有成故華胥履跡而雄氏孕女登感神而炎運作星流華渚而白帝生月貫幽房而黑精降明明有夏穆穆塗山禹娶於度土之辰女婚於台桑之地搜奇帝紀識異歸藏東生發蒙而有述韓子稱賢而不朽漢臣之筆泉墨海陳其令名秦相之一字千金叙其嘉應士歌南國徒聞候禹之詞石破北方終見生余之兆則郭璞所謂陽城西啟母石李彤所謂嵩山南啟母祠隨衆之說有徵鴻烈之言無爽者矣昔者鸞川之上母變空桑豚水之濱男生破竹美人之虹名蠓螭仙婦之月作蟾蜍精衛銜木而償冤女尸化草而成媚山崩蜀道臺候婦而無歸石立武昌亭望夫而不反論乎誕載羣下莫尊於帝王語乎遷易凡百無聞於感致美矣哉不可得而稱也大唐革去故鼎取新撫運而生繼天而作握乾元而造物海內知春闢混沌而爲家域中無外天皇曆數順謳歌金匱玉樞服皇王之能事衡室廟堂承祖宗之茂烈垂衣裳而作元后端拱北辰負黼展而朝諸侯嚮明南面周邦赫赫其道洽於成康漢室巍巍其化踵於文景東漸西被逮安邇肅海三年而無波雲連月而不散天瑞降地符昇靈鳳五文歲時來

苑囿神龍八卦昏旦游池沼禮云乎哉無取於周旋揖讓樂之謂也必在於移風易俗司祿益富家國於是乎有餘司命益年臣人於是乎不天明王三懼未嘗遺戒慎之心天子四鄰莫能展弭諧之用家安其業但聽於鄰難人得其和遂同於野鹿表識記奏河圖四十六事之著明曷云尙也登泰山禪梁父七十二封之可識何以加乎且夫窮聖神備道德滋萌元氣開闢太初斯乃天皇氏之以應乎天也依土地明神靈駕六羽而上騰度九州而下濟斯乃人皇氏之所以順乎人也造書契教畋漁合五緯而節四時登九天而類萬物斯乃義皇氏之所以制人法也務播植該變通嘗藥以救兆人聚貨而交天下斯乃農皇氏之所以興人利也振鼙鼓載龍旂天則元女受符帝則黃神降斗斯乃軒轅氏之所以除人害也均度量正郡邑總秋令於金天分瑞宮於鳳紀斯乃帝昊氏之以爲人極也潔祭祀義鬼神履時以象天養財以任地斯乃帝頊氏之所以爲人教也秋乘馬春乘龍順三辰而天道平建五正而人事理斯乃帝辛氏之所以爲人政也明如日晦如陰人無識其名帝何力於我斯乃帝堯氏之所以昭君德也聞一善舉八才帝唱動而爛星雲天歌發而踰鳥獸斯乃帝舜氏之所以章后功也夫三統者道之大五行者生之宗三皇法之而列五帝則之而序道以

三興德以五立非天下之至聖孰能兼此者乎而猶雖休勿休損之又損下明詔發德音尊天而重
人省方面巡狩舉星畢曳雲稍召風伯以清塵命山靈而護野馳洛邑驚襄城天廻而地游雲合而
霧杳周穆王來遊太室先徵夏啟之居漢武帝有事嵩丘卽訪姒開之石徒觀其丹青歲古霜露年
侵聖情有隘興言改葺其山則古文之外方其地則新邑之中土銘壇迤邐斜分玉女之臺碑闕相
望近對石人之像金草生而五色貝樹長而三花紫雲合杳於澗溪白霧氤氲於巖嶺考之易林信
惟神明所伏求之遁甲固以威靈肅然夫其命有司乘務隙因高背下察隱隣之餘基審日觀星揆
摧殘之落構周官置臬郢匠揮斤異態神行全模造化紅葩奪日飛累榭於山間綺綴衝風架廻廊
於木末仙人在棟神女臨窗周施玳瑁之椽徧覆琉璃之瓦赤玉爲堦瑩黃金作門闕山如白岸樹
似青溪羞蘊藻於前庭藉生芻於後徑蘭香夾水居然洗沐之資竹帚臨風自隔塵塵之慘夢臺雲
雨宋玉對而先驚楚壁山川屈原書而幾倦壽宮幃兮不擾象設安兮逾肅霜羅曳曳雲錦披披鴛
鴦褥兮翡翠幃白羽扇兮青絲履垂玉鸞之佩若往而若還戴金雀之釵不長而不短其居處也曖
曖昧昧陰閉陽開其被服也煌煌熒熒霞駸雲蔚鼎俎則麟胎鳳卵烝蕙燃葵餌膳則木蜜金膏玉

漿瓊酒當是時也合五嶽訊九魁選太陰命元闕馮夷鳴鼓女媧清歌左蒼龍兮吹簾右白虎兮鼓瑟金真拂座玉女焚香肅肅習習天媛來風雨霏霏神姬下霜雪孔雀飛而儀鳳舞弄女邀歡輶車合而羅綺陳智瓊陪宴麻姑學道變海水而來遊織婦希風填河津而下謁洛妃綽約江妃綿眇元女以明月爲珠素女以積雲作髻九天眞母八極夫人畢集於茲矣青霞衣兮翠雲裘靈連蜷兮旣留車廻風兮馬飛電視倏忽兮無見昔者濟陰山下降堯母之精靈湘川水曲留舜妃之響像壇壇或在徒聞分福之名棟宇不修誰辨安歌之處豈知夫三仙福地百姓尊祠挾王者之都畿當聖人之順動犧牲玉帛可以洽氣和神幼婦外孫可以披文相質虔奉綸旨式陳壯觀雖周人作詩自得后妃之美而魏臣獻賦終慙神女之工敢作銘曰

九州地險五嶽天中蛟龍洞穴日月仙宮蓄洩雲霧震蕩雷風笙歌近接鐘鼓遙通其昔在媧帝洪

泉未塞昏墊下人汎濫中國於鑠大禹顯允天德龍書旁分螺書徧刻其佩文北海省土南方還從

碣石更下台桑予娶有禮我都攸昌八年不顧四載惟荒其宛委旣登輟輟佇鑒室家誤往熊羆方

作天道幽祕生涯糾錯其化則遷其靈是託其宓妃之館仙女之臺物類感通精魂去來巫山廟立